

# Communicaziun da pressa

Bern      5 da mars 2018

---

## **Il Comité da la Convenziun da basa dal Cussegl da l'Europa per proteger las minoritads naziunalas sin visita en Svizra**

**Ina delegaziun d'experts dal Cussegl da l'Europa vegn a visitar la Svizra dals 5 fin ils 8 da mars 2018 per s'infurmar davart la realisaziun da la Convenziun da basa per proteger las minoritads naziunalas. En il rom dals inscunters e da las differentas visitas en il pajais vegn tractada en spezial la situaziun da las gruppas da la populaziun svizra renconuschidas sco minoritads naziunalas tenor la Convenziun da basa, q.v.d. las minoritads linguisticas naziunalas, ils Jenics, ils Sinti e Manouches sco er la communitad gidieua.**

La delegaziun vegn a participar a reuniuns cun represchentantas e represchentants da l'administraziun federala, da las autoritads chantunalas e communalas sco er cun parlamentarias e parlamentararis federalas. Ella vegn a sa scuntrar cun pliras cuminanzas d'interess da las differentas minoritads naziunalas renconuschidas e d'autras gruppas minoritaras sco er cun ONG activas sin quest champ.

En il chantun Grischun èn prevesids discurs cun las autoritads chantunalas e cun las organisaziuns tetgalas per la promoziun da las linguas e culturas rumantschas e talianas. Ensemen cun la Fundaziun «In futur per ils viagiants svizzers» vegnan ils experts a visitar ina piazza da transit frequentada da viagiantas estras e viagiants esters sco er ina piazza da dimora abitada da Jenics e da Sinti/Manouches svizzers. A Berna vegn ad avair lieu ina reuniun cun represchentantas e represchentants da las cuminanzas d'interess dals Gidieus en Svizra. Ils commembers dal comité vegnan er a sa scuntrar cun gruppas che n'èn betg renconuschidas sco minoritads naziunalas tenor la Convenziun da basa, q.v.d. ils Roma en Svizra e persunalitads muslimas, per s'infurmar davart dumondas da l'integraziun e dal dialog.

Suenter questa visita vegn il Comité d'experts dal Cussegl da l'Europa a preschentar fin la stad da l'onn 2018 in rapport davart la realisaziun da la Convenziun da basa en Svizra. Alura vegn il Comité dals ministers dal Cussegl da l'Europa ad approvar conclusiuns e recumandaziuns per mauns da la Svizra, resguardond er las posiziuns exprimidas da las autoritads svizras. Questas visitas d'expertas e d'experts dal Cussegl da l'Europa per examinar la realisaziun da la Convenziun da basa per proteger las minoritads naziunalas han lieu mintga tschintg onns en tut ils pajais ch'han ratifitgà la Convenziun. Per la Svizra sa tracta da la quarta visita. Ella ha ratifitgà la Convenziun da basa per proteger las minoritads naziunalas l'october 1998. la Convenziun è entrada en vigur in favrer 1999.